

# No Servus, Diener und Habe die Ehre!

Etze kummt dos

## Nej su wos

vu Sömde, n 22. Oktouber 2022



Ingrid Zasche

---

## Harbst

Etze össes wiedr Harbst. Ich bie jo schunt lange ane Stodtpflanze und weiß gor ne, ob se uf n Faldrn ömmr noch s Arepplkrottsch vrbrenn tun, odr ob mrsch heutzutage andersch macht. Obr ich kon mich noch of Arepplfeuerle ei maner Jugnd besönn und wie gutt dos schmackte, wemmr su a poor frösch geklaute Areppel ei dr heißn Osche hout gar wern lossn. S wor worscht, ob möt odr ouhne Stannioul odr ob mr sich ban Obschäl'n vu n Stannioule odr dr schworzn Krost a bössl de Pfeckl vrbrannt hout - s wor ejfoch zu Tude gutt, dou hout mr ne amoul Saalz drzune gebraucht.

Ich ho ou schunt lange kenn Trachn mieh fliegn sahn odr de klinschn Spinnl o ihrn Aaltweiberfädn. Obr ejs ös söcher: De Blatl o dan Bejmrn wern ömmr noch gale und rut und braun und mouln a Feuerwark vu Forbn ei de Landschoft, bevr dosse rundfalln und de Stroußnkehrer zr Vrzweflung brengn. Vur olln, wenn sötte vrflichthn Luderkröppn dorch enn grode orscht zomgekehrtn Blatthoufn raschln, sich drmitte beschmeissn und olls wiedr ausanandr zernn.

Dou drzune ho ich schunt vur a poor Juhrn a Stickl geschriebn (wie dr Siegmund Michl sohn täte), obr salt ock nouch dr Schröft. Ich ho probiert, ob ich ou amoul su a Sonett zustande brenge und fond s ne amoul su drnabn. Wie mr dann drletzt an Mundortkreise s Thema „Harbstgefiehle“ hottn, ho ich mr de Miehe gemacht, s eis Paurische zu iebtröhn.

Dou össes:

S ös triebegrou und s nieslt ei enn Dune,  
ols weißn Hauch sitt mr n ejgnen Oudn,  
a Storm vrbloust dr deine offnen Loudn  
und uf de Are kummt noch ane Blatschicht drzune.

Dan Kindrn össes gleich, se raschln, lärmn  
vrgniegt und fruh dorch troige Blatthoufn,  
se mischn Braun und Gold und Rut ban Loufn  
und giehn dann frehlich hejm zun Wärmen.

Se tun noch ne o n nohndn Wöntr denk'n,  
genissn ock de heitern Ougnblicke,  
die n dos dötte Raschloub tut schenk'n.

Und mit enn Lächln denke ich zoricke  
wie ich tot salbr mane Schriete lenkn  
vul Selichkeit dorch s Blatthoufn-Raschlglicke.

Vrhoul'n tu ich moichmoul ömmr noch dorch troige Blatl raschln. Dos gieht jo ou ganz gutt, wenn se noch ne zomgekohrt sein, nauar. A bössl muss mr sich abn ou ols ahler Mensch ane Kindrsiele bewohrn.

Mejnt dr ne ou?

---